

უჯარმის ნანგრევები

ქვაკუთხედი ლოდები...
ნამტვრევი ნანგრევები...
აქ ცხოვრობდნენ ოდესღაც
მორკინალი დევები.

ქვად ხმარობდნენ ზურგის ძვალს,
სისხლს - სამირკვლის წებოდა;
მათი ხმალის ნაკრავით
რაზმი ილევებოდა.

თუმცა სვამდნენ ჩარებით,
ჰქონდათ რკინის წვივები, -
აწუხებდათ მოწყენა,
ტალახი და წვიმები...

დარჩა ტყე და სიჩუმე,
ხეზე მღერის შროშანი...
 ხის ქვეშ დამიწებულან
 ლაშქარნი და დროშანი...

1925 წ.